

EXPO Hoben y Talentoso a habri na Colegio San Nicolas



RECIENTEMENTE e Comision di Hoben y Talentoso den presencia di alumnonan di scol, rolemodelnan y Director sr. Goedgedrag a habri e EXPO Hoben y Talentoso na Colegio San Nicolas. Miembro di e Comision, sr. Ditto Acosta a hiba palabra splicando e meta tras di expone e EXPO Hoben y Talentoso na nos scolnan basico y avansa na Aruba. Director Goedgedrag a keda masha contento cu Colegio San Nicolas a wordo escogi como e prome scol pa EXPO Hoben y Talentoso. Manera el a expresa cu ta masha importante p'e alumnonan di scol sera conoci cu e hobennan cu a destaca riba varios tereno y cu a wordo reconoci pa nan talento y meritonan. Aruba conoce hopi hoben cu ta traha duro pa bay dilanti, cu ta ehempel y inspiracion pa otronan, pa cual motibo nan merece di wordo poni den luz positivo.

Presente n'e bunita mainta aki tabata algun di e rolemodelnan cu ta aparece den e bukinan di Hoben y Talentoso. Nos por a mira e conocido atleta Sarah Quita Offringa, kende ta 8 bes campeon di mundo den windsurfing y tambe a caba di estrena su pelicula na Aruba, Caibeibusha. Presente tambe, e artista Cado de Lannoy di Korteweg hunto cu e conocido pintor y fotografo Armando Goedgedrag, atleta Julianne Dorothal y e modelo Stephanie de Andrade, e ultimo dosnan ta alumnonan di Colegio San Nicolas. Cada rolemodel tabatin e oportunidad di conta un poco di nan mes y e pasion cu nan tin pa loke na ta haci. Esaki sigur a hala atencion principalmente di e alumnonan presente den e aula di dicho scol. Na final e alumnonan tabata entusiasma di saca potret y pidi autografo serca cada rolemodel presente.

Por ultimo sr. Acosta a haci entrega di 20 buki Hoben y Talentoso 2015 na Director Goedgedrag y e alumnonan por a presencia tur e 104 rolemodelnan reconoci durante di e tres añanan di e proyecto Hoben y Talentoso.